

فاطمة عبد الوهاب

قصاقيص وجع

أشعار

صدرت الطبعة الأولى في يونيه ٢٠١٩



(أشعار)

قصاقيص وجع

بطاقة الكتاب

عنوان المؤلف	قصاقيص وجع
المؤلف	فاطمة عبد الوهاب
التصنيف	أشعار
رقم الإيداع القانوني	٢٠١٩ - ١١٠٣٠
الترقيم الدولي	٩٧٨-٩٧٧-٦٧٢٦-٠٩-٣
رقم الإصدار الداخلي	٢٠١٩ ٤٢٤ الطبعة الأولى يونيو
عدد الصفحات	١٠٠ صفحة
المقاسات	٢٠X١٤
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأي دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 - 020554372901 طيفاكس:

البريد الإلكتروني: nagyegy200064@gmail.com alnilwaalfourat@gmail.com

البريد الإلكتروني: alnilwaalfourat@gmail.com alnilwaalfourat@gmail.com

المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ 13 - قطاع 304



(أشعار)

قصاقيص وجع

الإهداء

إلى أستاذي العزيز الشاعر محمد مهران معلّمي وملهم
قلمي والذي لولاه ما خط قلمي شعرا كما يجب وأتمنى
أن أكون على قدر ما أولاني من ثقة كتلميذة في محراب
شعره

كما أهديه إلى كل من يجد في كلماتي المتواضعة شفاء
لأوجاعه إلى كل من تملكه اليأس ووجد في بعض
كلماتي طريق أمل ولكل من يجدها ليست مجرد كلمات
وإنما محاكاة لواقعه وأخيرا أهدي كلماتي لكل من سئم
الواقع وطار محلّقا في سماء الشعر والخيال



رحلة وداع

صوت النداء أعلن خلاص

بإندة تحذير أخير

أنا قلبي ناوى ع السفر

حزم معاه كل الوجع

والهجر أصبح منتظر

خلصت معاك كل الحجاج

وتعبت من لوم القدر



مع كل كدبة كدبتها
كانت إيديك تمضى لى
على حبة ورق
العمر ضاع قدام عينيك
والباقى م الفرح اتسرق

لميت همومى ودمعتى
وكل اللى كان
واتحملت كل الشنط
فوق ظهر سكة للوداع



دورت بين الذكريات
على ضحكة كانت من زمان
على صورة يمكن افكر
لو لحظة حسيتها بأمان

لكن الحقيقة إن الغرام
كان سهمه آيل للسقوط
تقدر تقول كان ابن موت
وتفيد ب إيه الذكريات
مع حد مات



ومشيت طريقى لغربتى
صفر خلاص قطر الوداع
دخان خداعك كان بيخنق
كل شئ
والسكة ليه رغم البراح
حساها ضيق

هما يادوب كانوا خطوتين
حسيت بروحى بتنسحب
مش شايقة عينى غير سواد
والنبض قل ومرة زاد
أتارى دة ألم المخاض

ما أنا روحى لسة بتتولد
من بعد موت
وحياتى كانت فى البعاد



ألومك ليه

ألومك ليه .. ألوم على قلبى ... كان طيب...ويستاهل
وأهى دنيا ... وفيها كتير ... ولسة ياما هنقابل
محدث فيها عاش مرتاح ...وأهى أيام بتتقضى
وأنا هارضى ... وإلى يرضى بظلم قلب ... يبقى جاهل

حضرة المعنى إالى غايب

هو أنا لو قولت

إنى بحبك ها يكون تزوير!!؟

ما هو أصل الكلمة

إلى ف قلبى ملهاش تفسير

وأنساك ازاي وانت حياتى

والعطر الباقي ف أنفاسى

ودة جزء بسيط من إحساسى

والباقي كتير



حضرة المعنى إلى غايب

وإلى عاجز

توصف الحب بصراحة

فين كلام كل الأغاني

والحروف فيه مش مباحة

فين بحور الشوق وليلها

فين نجوم العاشقين

فين كلام طول الليالي

فين حكاوى السهرانيين

كل دا ولا يسوى ذرة
جنب عشق المجذوبين
إلى حب وعقله شارد
ليل نهار عايش حزين

أصل معنى الكلمة صعب
كلمة مليانة بحنين
والقليل ف الدنيا حب
راح زمان الصادقين

قول منهم لله

الجرح والأوجاع ... فارشينه فى طريقنا
والعمر عدى وراح ... ولا عمرنا فرحنا
قول منهم لله ... زرعوا البكا وراحوا
والقلب نبضه الآه ... يتخبى فى جراحه

كشف حساب

هيجى يوم ونتقابل...وتطلب منى كشف حساب
وترمى عليا ١٠٠ اتهمة...عشان طبعك تعيش كداب
وأنا قلبى .. لا يوم باعك .. ولا خانك
ولا ف درب الهوى سابك...ولا قابل يجمعنا كلام وعتاب



خطوة عكس

نويت البعد ١٠٠ مرة

وما قدرتش

نويت أنسى معاك حلمي

وما عرفتش

كل ما أبعد ألقى نفسي

راجعة إليك

وكل ما أقسى الحنين

بياخذني إليك

أروح أتوضى من تانى

بنور شمسك

وأتونس مع ليلى

بنسيم همسك

ياريتنى ف يوم قدرت أبعد

ومع قلبى عرفت اعد

دة أنا ببعد ألاقى القلب

بينادى على وصالك

وألاقى الخطوة مشيت عكس

راجعة لك



بنت موت

صور الجمال جوا القصيدة

ساعات تكون كالمعجزة

وأنا صوري ليه

دايما بتيجي معجزة

أو عاجزة

والشعر شايب فوق جبين

مليان خطوط ومكرمشة

القصد كان حدوتة حلوة

عن الفرح

فجأة الكلام لبس السواد
ورقص وغنى ع الوجع
والناى حزين يشبه آهات
على مبتدا من بدرى مات
من يوم ما فكر كيف يخون
ومد إيده لحرف جر
عشمان ف عون
ييجى الخبر مش ناوى شر
مكسوف يدارى دمعته
من مبتدا
سابه ف طريق مع وحدته
والنعت خايف



م الحقيقة المزعجة
ما الحمل كله كان عليه
ازای يقول إن المخاض
كان جای بعده بنت موت
ويادوب يومين بعد الصراخ
مش لاقى صوت
وفعل ماضى
لسة ماضى ف الطريق
خائق بإيده كل فرحة أو أمل
والمضارع مات يصارع
كل هم مضاف إليه

وبفعل أمر اتنفذت كل الخطط
بعد أما ضائق الوسع بيه
طلعت قصيدة مشوهة
والحرف كان معطوف عليه

توأـمى

بصيت ف وش الوجع ... لآقـيته يشبهنى
الفرح عنى أمتنع ... والحزن يخطفنى
ساعة الوداع كانت ... ساعة طلوع الروح
والدمع مش مسموح ... ولا راضى ينصفنى

رحلة قمر

معقول تسافر جوا منى؟
وازاى بنظرة واحدة بس تحسنى؟!
وازاى بصوتك بس وحده تضمنى
القلب فارد لك شراعه ف رحلتك
وبيستمد قوته من قوتك
والعمر قبلك كان مفيش
معاك وبس رجعت أعيش
والأسئلة فرشت طريقك أجوبة
عن إالى كان وعن إالى فات

عن عمر عدى وذكريات
وعن مرار الإنتظار
وليل طويل مليان سكات
من يوم لقاك بدأت حياه
مليانة فرح وأمنيات
ومع إن أنا وقلبي ف مداك
بنلف كل الكون معاك
إلا أنى لسة متحيرة
ازاى أكون شايلة قمر
بين الضلوع
وأدفع بعمرى التذكرة!!

عُمرُ للبيع

يا عمر مين يشتري ... ليالى لونها سواد
إوعاك فيوم تفتكر ... إن إالى فات يتعاد
فاتت ليالى كتير ... نحلم بطعم الفرح
نصحى نفوق على جرح ... وكل يوم يزداد

رسالة إليها

حبيبي حروفه ضلاليه
وعلى غيرى شمس تحرق
حسبي وإننى بتفوتى على الكلمة
لأوهامك ف يوم تغرق

كلامه قبلى كان ليا وأنا عارفة
وبروحى سكنت أيامه
وكنا روحين بنتلهف على روحنا
وعيشت سنين فى أحلامه

أرضى البور
بقت جنة عشان خاطره
سمايا نورها فاق النور من ضيه

ربيع العمر وعبيره رجع تانى
أتوه ف عينيه
ألقى القلب عنوانى

وبعد سنين من التوهة
رجعنا نعيش
فمتظنيش

ولا تشطح بيكى الفكرة
إن كلامه كان ليكى ولو مرة

دة كان قبلى كما البحار
وبيدور وأنا حاسة
رجع لى ف آخر المشوار
فكنت الشط والمرسى

بقيت الملهمة الأولى
برغم إنه كتب قبلى كتير دواوين
اتارى الحرف كان تايه
لعله ف يوم يقابل عين

شبيهة عين
كان شافها ف أحلامه
فعاد يكتب من الأول
وغير ورقه واقلامه

عمل فاصل ما بين حرفي
وكل حروف كانت قبلي
ونقطة ومن بداية السطر
حبيبتي.. عشقي.. وحياتي
لا عيشت ف يوم بعيد عنك
ولا أيامي محسوبة ف خط العمر

وبيكى هاعيش كما الآتى
حلاوة الشهد من ريقك
تسبينى سنين المر

وأعود بيكى الزمن تانى
ألقى الحرف يتلون
وأشوف الكلمة وكأنى
بشوفها تانى م الأول

كفرت بكل أحلامى وبكلامى
عشان عينك أكيد أجمل
هعيد ترتيب لأوراقى
والملم كل دواوينى
وأقول كان كل شئ مكتوب
ف كنتى سر تكوينى
ورب الكون خلق روحى
لجل ما يوم تقابلينى

دليل الغرام

وحياة عيونك رد قول..فين دليلك ع الغرام وعلى الهوا
ازاى بتتحمل كدة كل الوجع..مش قولتلى هنكون سوا
إياك تقول على عشقنا..دول نظرتين أو كلمتين
طب فين نصيبى م الأنين..ولا كلامك كان جدار ثم هوى

شيطان الفكر

شيطان الفكر جويا
يطارد كل أشعارك
برغم الضحكة موجوعة
ورغم الشوك ف مشوارك

ب اعشم روحى بالفرحة
وادارى الدمعة ف سطورك
وامتى الفرح يجمعنا
وتأخذ م الهنا دورك



ونسرق م الزمن لحظات
ونخطف منه كام ضحكة
تغيب الشمس تدارى
وشوقنا يزيد حبيبي إن بات

وابات احلم أنا وقلبي
أكون لك بيت وضلاية
يهون الصعب ويايا
تحس معايا بوجودك
وتحيي القلب بعد ما مات

بنمٹل علی روحنا

بنمٹل علی روحنا ... وبنقول إننا عایشین
وتاھت مننا روحنا ... مابین آھه ووجع وانین
حتی الصبر مش قادر ... یکمل رحلتہ معانا
ومہما نداری جوانا ... اکید باین فی نن العین

حبك حياة

هو إنت عرفت ازای قولى
توهبنى حياه من بعد الموت
وغرامك ليا يكون القوت

وقدريت ازای تسقینى الحب
ف عز الصوم
وازای قادر تبعلى عيونك
تقلقتى من عز النوم

انا كنت ناويت ادفن قلبى
وقتلته حنينى لأى غرام
لميت أحلام عمرى الضايغ
وحكمت عليهم بالاعدام

حبك وحده

رجع لعيونى وقلبى النور
وبدرت الفرح ف أرضى البور



من بعد ما كان النبض سكوت

بقى عايش حى

ولأول مرة بعيش يومى

واستنى الجاى

بنت قلبى

حبيبة قلبى .. نور عينى .. وروح روحى
نظرة واحدة فى عيونك ... دوا جروحى
رغم سنك .. وانتى بنتى .. شائلة همى
ماتت أمى .. ف كنتى سرى .. وليكى بوحي

قصاقيص وجع

إيد الوجع
ماسكة ف إيدية متبته
وخداني ف طريق النواح
الفرحة لسة
يادوب خضار ومنبته
شربت دموع طرحت جراح

حكم القدر .. لبسنا توب
دارى فملاح عمرنا
نسينا جواه الأمل
ودفنا وياه حلمنا



كان توب يادوب أد المقاس
مليان بقصاقيص الوجة
ضحكنا غصب ف وش ناس
والفرح سهل وممتنع

ماتغر كوش الضحكة
ف الوش الشباب
العمر لسة بيبتدى
والقلب شاب
الحزن ساكن عشنا
وأيام عذاب

ماشيين ندارى ف دمنا
والفرح مش مشروع
عايشين صحيح
ولا حلاوة روح



سكت الكلام وأتمنع
كام قلب كان عايش ومات؟
روحنا بترسم بالوجع
فوق ركن ملين ذكريات
واتبدلت أحلامنا يأس
وكسا شفايفنا السكات

الدنيا سيما

الدنيا سيما ... وناس ب مليون وش
ونفوس لئيمة .. لابسين قناع الغش
لو يوم حسبت ... حواليك كتير
عيد حسبتك ... وارجع واقول معلىش

العبرى

معقول كدة.. لأ عبقرى

تبدر حروف العشق

فوق كل الورق

فتلم حيرة.. ونار وغيره

وعد شوف

كام قلب ف هواك اتسرق

قول والنبي

إزاي بترسم على جبهتك

صورة نبى

وازاي بتدارى كدة



فهينة حمل
فالمحتمل.. لأ دة الأكيد
مين باع ضميره بالخداع
هيجيله يوم..فيه يتسرق
رب العباد شاهد وعالم مطلع
عيب يا جدع
توب الرجله اخلعه
دة أنا شوفت وياك البدع
ازاى بتكذب وبضمير
وبكل زيف قادر تسير
ماصعبش يوم مرة عليك
قلب ف هواك داب وأتخدع ؟

تقدر تقول إيه ذنبهم
عشقوا بعيونهم كلهم!!
ولا بسنارة الهوى
ولا إنت شاطر ف الكلام
لكن الملام مش بس ليك
ارجع ولوم على جهلهم
روح قولهم
إن الهوا ف شرعك كلام
والقلب ملهوش مرتجع
هانت عليك ازاي كدة
دمع العيون
وازاي بتتلون كدة

على ألف لون
بتقوم توزع كام صباح
وميعرفوش
بعد الوعود هايكون جراح
ولحد إمتى يا عبقرى
تقدر تمثل ع الجميع
ردك سريع
ف الكذب واخذ دكتوراه
لكن كدة ماشية الحياه
يوم ليك وحاول تغتتم
فيه طوق نجاه
لجل أما ييجى يوم عليك
تلاقى حد يسندك ويقول سماح

حروف الكلام

جمعت ف حروف الكلام ... ومسكت ب ايدية القلم
نزلت دموع فوق الورق ... والجرح نازف م الألم
ب الزيف بنكتب ع الفرح ... قادرين ندارى ف الوجع
لكن الزمن لا فيوم رجع ... ولا عاد هينفع الندم

عاشقة الوحدة

جربت ف يوم
تقعد مع نفسك تحكيها
تسمع منها أو تشكيها
جربت كمان
على وتر الحزن تغنيها

جربت تكون عايش وحدك
حوالك الناس
شوف أولها وأدى آخرها



لكن روحك عاشقة الوحدة

مستنى شبيهه

وشبيهك فين؟

شبيهك أهو عايش زيك

مربوط ورا ساقية ودوامة

حواليه م الناس حواليه ياما

بيدارى الدمع ف نن العين

ويبدل جرحه بأفراحهم

كاتم ف القلب ٢٠٠ آهه

عايش بيحقق أحلامهم



والراحة دى كلمة ومنسية
والشعر الأسود بقى أبيض
لو حقق ليهم أمنية
امانيهم بكرة بتتجدد
والدنيا أهى واقفة بتتفرج
أقرب قلبين ماشيين الإثنين
ف طريق واحد

الحب جمع بينهم لكن
زى القضبان
لازم عن بعض بنتباع



ونعيش من تانى ف زحمتهم
جوانا الوحدة بتنهشنا
ونتوه بنحقق مطالبهم
ونعيش القرب ف أحلامنا

وتعود من تانى لأحضانك
تحضن نفسك
تسمع منها
أو تشكيها

ما الوحدة خلاص سكنت روحك
وشبيهك زيك متصاحب
على وحدة روحه ف زحمتها

طریق رجوع

ضحك عیونی وقت لقانا ... کان بیداری بحر دموع
ازای قادر تظلم قلبی ... وتكون راضی یعیش موجوع
عایز تجلد قلبی بهجرك ... وانت القاضی
ولیه مش راضی ... یفضل بینا طریق لرجوع



المحاكمة

فُتحت الجلسة و حاضر
قلبي بس وكام محامي
هما عيني ونص عقلى
هو دة كشف الأسامى

والقضية غريبة جدا
يا إالى شايف واللى سامع
قلبي جاى لجل يشكى
وجاى برضو عشان يدافع

يشكى من بُعده وعماله
وفجأة يلقي ألف عذر
يفتكر حكايات غرامه
وتانى ينسى كل مُر

والقضاء حاسيين ب حيرة
وباقى عقلى والجوارح
بس تيجى عنه سيرة
ألقى كلّى تاه وسارح



هو دة اللغز الغريب
إلى جاية وطالبه حله
هو إحساسى عجيب؟
ولا حبى ليه ف محله؟

رفعت الجلسة و فاتونى
دخلوا جوا للمداولة
وبودانى سمعت حاجب
قال لا قوة وألف حول

فتحت الجلسة فثنانى
أصل حالتى كانت عويصة
قالى قلبك شكل تانى
وأى حب عداكى هيصة

بس قولى فىن حبيبك؟
ليه مجاش وسط الحضور؟
ومين إالى قالك إنه غايب!!
دة جوا قلبى وألف سور

على شط الحلم

و لأنك راضى ومتفائل...والصبر معشش ف ضلوعك
برغم الدنيا إلى معنذاك ... عمالة تكسر ف قلعك
على شط الحلم بتتقابل...مع فرحة جديدة ف توب العيد
والجأ أكيد ملى بالخير...وماعدتش مكان فيه لدموعك

عشق صعيدى

خاير إنت

خاير انت اما اكون

وسط زحمة ووسط لمة

مش شايفة غير صورة عينيك

وشوق ايدينا لكل ضمة

حتى ف سكوتنا بدون كلام

خلص الكلام فصحى وعامة

فاكرة ف عيونك ضحكتك

وبكل شوق أنا فاكرة لما



من غير سلام بين الكفوف
لكن القلوب بالحب عالمة
وعينية تيجى عشان تشوف
لا شايقة خال ولا شايقة عامة
كل إلى فكراه إننا وسط الزحام
لكنى عايشة ف دنيتك
مش حاسة زحمة

وحياة عيونك ياجدع
أنا قلبى مش حمل الهوا
واسمى ليه حساه دلح
أما ناديت وإحنا سوا

مالى كدة قلبى القوى
حس الغرام خر وهوى
القلب قبلك كانت وظيفته للحياه
ولا عمره ع العشق نوا
وأهو لما قابلك أعترف
دى مش حياه
وعن طريقه قام غوى



لقا مبتور

لفين وخذانا أحلامنا وليه دايمًا... لقاءنا يكون... لقا مبتور
ونسنتى .. تجود الدنيا من تانى ... ويبجى الدور
وأرجع سكتى لوحدى ... مع الذكرى وأوراقى
فايتة الروح واشواقى ... واسافر والشراع مكسور

بقايا الروح المتهالكة

بقايا الروح المتهالكة
بتلملم باقى الأشلاء
وتدارى النوح
تايهين وبنكدب على روحنا
ونقول عايشين
لكن خافين
إننا نحلم أو حتى نبوح

بنقول أيام وهاتتقضى بالطول والعرض
والحب دة سنة ومش واجب
ولا حصل فرض

وبنضحك وندارى الصرخة
ورا توب أفراح
نتقابل دايماف الدنيا
مع جرح جديد
اتارينا بنهرب من آها
على دنيا جراح

وكأن الدنيا معندانا
ف بتحررنا من ليلة عيد
ونعيش مع روحنا المتهاكة
ونللم باقى الاشلاء
نلاقينا بنكدب على روحنا
وعيشينها جراح

السكوت أعظم

يفوت الليل مع نهاري ... ولا صاحي ولا بحلم
تشوفني تقول أكيد راضي ... وربك بالعباد أعلم
عمر الكلام ... ما يغير المكتوب
وهمك مسيره يدوب ... يبقى السكوت أعظم

خلاصة القول

ما يكتبش عشان شاعر

يرد يقول ٢٠٠ الله

وعارفة كلامي مش

منظوم لا ف بحوره

ولا القافية دا أنا

والله بلم حروفه بالعافية

ساعات أجى أجيب فاعل
أبص الأقيه صبح مفعول
وأكون قصداك ف شطر جميل
ف يصبح مبنى للمجهول
وحرف الجر ليه عاصى
وأحايل فيه..
ألقى جوابه مش منقول
ولو اسأل متى وكيف
يكون الرد مش مسؤول
ولو مرة أجى استغرب
ألقى العادى والمعقول

خلاصة القول ..
كل كلامى ليك إنت
عشان تقراه ب أفراحه وأحزانه
وقولة الآه ولو هاكتب ..
ويقرالى رجال الكون
ولو أسمع ٢٠٠ الله
أحس الكلمة دبلانة
يتوه الطعم ويا اللون
ويكفينى
يفوت على حرفى أحلى عيون
ساعتها أحس بكلامى
يفوح عطره يرج الكون
وأقول الله على مرورك ٢٠٠ الله

ليلة وجع

ليه الوجع حالف... على ١٠٠ يمين ليزيد
نصبر وحتى الصبر... مبقاش يا خلق يفيد
حتى ف ليلة العيد... مكسورة فرحتنا
وناقصة لمتنا.. طب ليه يا فرح عنيد

من غير عتاب

بعد أما شوفت معاك عذاب

أفضل عقاب

إنك تكون وياها دايما
فى الحياة

وأنا قلبى فاز

بعد أما عاش وياك ضياع

من غير خداع

البعد عنك طوق نجاه

أنا كنت فاكرة

إنك ف يوم هاتكون شراع

وتاخذنى من بحر الدموع

أتارى القلب كان مخدوع

وكان واهم ومش فاهم

إنى يادوب وسط الجموع

ترمينى ليه وسط الهموم
وليل هوايا يكون غيوم
ونسيت قوام إالى ف هواك
اتجرعت كل السموم

وتبيع غرامى عشان غرام
كل إالى حيلتك كان كلام
وأنا كل يوم
بحلم ببكرة يكون معاك
وكننت رسماك الأمان

دة أنا قلبى حبك بامتياز
والموت ف حبك مش مجاز
لكن النتيجة
طلعت ساقطة ف الإمتحان
و إالى خانت يوم هواك
يستاهلها حد خان

عادی

وراضی بالفراق عادی...أکید عادی مادام فی بدیل
وقولت ازای بحبك موت... فهمنی وهات لی دلیل
أنا عن نفسي مش هالحزن.. مادام القلب كان بايع
ولو ترجع .. مفیش شافع .. ولا قربك هیشفی علیل

سر الخلطة

سر الخلطة

إن جنابك شايف روحك

من غير غلطة

وأنا ممنوع على عقلى يفكر

وإن يوم فكر

تقلب عركة وتصبح ورطة

ممنوع اسأل أو استفسر

ما انت شايفنى
ب نُص عيونك
كنت مجرد لعبة ف إيدك
مثلا يعنى ملك يمينك
وإن أنا قشة
ف وسط الحاشية
وإن أنا واحدة
من جواريك .. آه مش أكثر

بس الغلطة
إن غرورك خلاك معمى
قلبى خلاص م الوهم اتحرر
عقلى كمان بقى سهل يفكر

شيلت غيامة
من فوق عيني
عيدت الحسبة مليون مرة
وبقيت اشطر
وإن كان قربي منك جنة
أو كان موتى هايبقى شهادة
قلبي بحبك ... قرر يكفر

أنا بايعة

أنا البايعة ومش ندمانة ولا هاندم ... بلاش تحلم
ياما القلب شاف منك ... وكان بالوهم متلجم
دورك كان عظيم جدا ... وتأخذ جائزة ع التمثيل
يا فايت قلبى لسة عليل ... وربك بالعباد أرحم

صرخة يتيم

أنا المجنى عليه منكم
لكن لومهم
يخليني أنا الجانى
وأعيش الذل ف الأيام

وكان الذنب مش ذنبى
يضيع اسمى
ويبقى الوصف ابن حرام

برغم الأم موجودة
يزيد واحد
ف قائمة طويلة م الأيتام

جيت الدنيا وحدانى
عشان اعانى واعيش مظلوم
وكل اللوم
على مخدوعة من تلعب
فى توب إنسان

ف ليلة غدر مع ضحكة
وغياب الأهل
كان م السهل
يتقابلوا ف وكر شيطان

يارب الكل قدرنى
أشيل الهم دة لوحدى
وماكنش جبان

ولا عمرى أجيب للدنيا
من ضهرى واحد تانى
عشان يتهان

ولو سألوني عن أصلي
يكون الرد أخلاقي
ودة الباقي
جيت الدنيا دي لوحدي
لكن إنسان

الشعر كيف

الشعر كيف .. وكيف الشعر مايدلش .. ولا عمره كان أكل عيش
الشعر حزن ودفا .. ف كل أحواله .. لو حتى مايدفیش
واللى غواه الشعر ... وقلمه حر صحيح
تلقى لسانه فصیح .. ويعلى صوت الحق .. لو حتى نام على خيش



لطمة الدنيا

بقابل لطمة الدنيا بكل هدوء

وبعد ما افوق

أشرب قهوتي سادة

واتناسى كما العادة

وادارى ف دمة معتادة

تزورنى بشوق ف ساعة الفرح

الاقى صوت صدى أمدى

يقول الدنيا كيادة

ودى العادة

ولو حنيتيلها يوم ضهرى

يزيد قهرك
وتلقى الجرح بزيادة
صحيح البطن ولادة
وبخت الأم دة موروث
وانا بختى كما أمى
لكن مع فارق التوقيت
زمان كانت لنا شمعة
وكان نورها حياة للبيت

بتحرق روحها علشاننا
ودة المعنى اللى ياما اتقال
لكنه ف يوم

ماكان ماضى ومستهلك
وأنا مع إنى من أهلك

صبحت أنا شئ ملهوش لزوم
وكل اللوم
ييجى ل حدى ويحود
خلاص ع الظلم متعود
صبحت أنا زى شماعه
تعلق كل أخطائك على كتفى
ولا يكفى

ولا حاسس بأن القلب مستكفى
وكيف قادر تسبب كفى
يشيل الهم دة لوحده
وليه تعلنها دايمًا حرب
وتعمل حزب ع اللى تحسه من صفى

وأنا بالرغم من ضعفى
بقابل لظمة الدنيا بكل هدوء
وبعد ما افوق
أشرب قهوتى سادة
واتناسى كما العادة
عشان البطن ولادة
وبخت الأم كان موروث

مفیش رجوع

خد بواقى الفرخ وامشى ... خد معاك نبضى وحنينى
وأوعى تتلفت وراك ... ولا تسمع صوت أنينى
كنت حلم جميل ولكن ... فى الحقيقة كان كابوس
عدى على جرحك ودوس ... مش هتلمح دمع عينى

ساعة لقانا

ملاح وشك الصافية
كانت حاضنة
ملاحى وكل مافيا
ونظراتك مدفيا
عيون القلب والننى

وكفوفك كانت ماسكة
بشوق الدنيا فكفوفى
تنسينى دموع خوفى
وعلى حبك تطمنى

وعدى اليوم كأنه بصيص
من الضحكة
وياخسارة
فاتنى بلهفة محتارة
ما بين الفرحة والفكرة
أبات ودموعى تدفى
على الذكرى
أسمع صوتك الهامس
أكيد لسة الأمل عايش
ب يرسم لون لقا بكرة

ب لمسة من عبير عشقك
ب نسمة من شذى عطرك
ب كلمة حب أولها
حروف اسمى مع إسمك



ومن غير نظرة ب عيونك
عيونك قالت القصة
هاتمشى ازای وانا جوة
هاتمشى ازای وأنا هو
حبيب الدنيا والآخرة

حبيب روحك
حبيب ذاتك
حبيب سكن إلی جای كله
وبيعزيكى مافاتك
خدى بوسة محال تحصل
خدى نبضى يزور نبضك
خدى شوقى
يقول عنى كلام يمكن
ماهوش عايش مع الماضى
لكن بيحاكى ملامحك

حلم الجدع

ازای بتضحك ياجدع ... ورد قولی أهم
ازای تمثل ع الوجع ... إن إنت مش مهتم
عایش فدنيا البدع ... شایل زكايب هم
آخرتها إيه ياجدع ... حلمك ف حضن يضم

قلم خام

قالولى قلمك ليه
بيكتب على استحياء
وكانه متلجم
أنا قلمى عاجز صحيح
ولا راضى يتعلم

وازاى افك اللجام
واسيبه ف ساحتكم
أنا قلمى أصلا خام
خايفة عليه منكم
كلامه عامى وفصيح
ولا مرة لف ودار
وقال الحديق يفهم



بيقصر المشوار
ويوضح المعنى
وبيرسم الصورة
ويوصل الفكرة
ملوهش ف التوهان
وحروفه مفهومة

ساعات يتوه ف البحر
ويسرح على شطه
وساعات يلاقى القافية
زاغت بعيد عنه
ومبقتش منظومة

أنا قلّمي لساه بكر
وراضية بحروفه
ادعوله يفضل كدة
يتدارى بكسوفه

أنا قلمي مش عاجز
لكنه مش عايز
يتوه ف مشواره
خلوه كدة ف حاله
سارح ف ملكوته
ويلف ف مداره
أنا قلمي لساه بكر
ولا يوم هابتغير
وإن يوم غوانى الحرف
عشمان ف تغييره
هقوله بعد الشر
كان فى غيرك اشطر

قول يارب

بكرة أحلامك تنولها ... والفرح حد السحاب
والليالي الجاية شائلة ... ضحكة من بعد العذاب
ارمى حملك ع إلی خلقك ... قول يارب
وابتيديها بكل حب ... والدعا هايكون مجاب

سكة شيطان

ريحة الشر ف هدومك
صبحت بخور البيت
فوق كل حيط
أنا شايفه فيها بصمته
طب ليه رضيت
تمشى ف طريقه وسكته

النظرة صبحت مرعبة
مش شايفه منك
غير شيطان
كانت حياه ومترتبة
أنفاسه ليه مالية المكان



ضاع الأمل ويا الأمان
خبط البيان
بيخلى قلبى ينتفض
واللمسة منك
تجعل وضوئى يتنقض

أروح اتوضى من تانى
وأصلى الفجر وادعيلك
لكن صوته غلب صوتى
ويبدأ يومه مع ليلى

وأنا ساكتة ومغصوبة
وبستناك مع التوبة
واملى بيت بشرع الله

وبعد سنين من المعاناه
جنيت الفرحة من غيرك
صحيح كان جاي من ضهرك
لكن عكسك ف تفاصيلك

وكان سهره لوجه الله
وربك وحده كان قادر
تبيع سيمك وتنتهي حياه
وابنى يكون طبيب شاطر

الصبر عنوانى

تقول الآه بلسانك.. تزلزل قلبى وكيانى
ويوجعنى وجع قلبك.. يزيد همى وأحزانى
تهون روحى .. وعمرى يهون .. فدا لروحك
دوا جروحك .. شفا لقلبى .. وباب الصبر عنوانى

عيون الفجر

سهرت عيون الفجر
تشهد على لوعتي
حاضنة خيوط الأمل
هي رفيق سكتي

غفلت جفون الليل
ودموعي ما ارتاحت
تاهوا الولاد مني
وفرحتي تاهت

إلى ف طريقه ضل
ودليله كان البوم
واللى حياته ذل
شايلى هموم بالكوم
حتى عريس الهنا
كانت جنازته اليوم

ولحد إمتى العلم
يكون مكان الكفن
قلوب كتير وعقول
ماتت وصبحت عفن



زينة النساء

قالوا عليها عايشة ازاي... مادام جناحتها مكسورة
لكن قدرت تعلى الصوت... وترفع راسها منصوره
عايشة قوية .. محترفة .. ومختلفة
ولا بالضعف معترفة ... وأجمل ضحكة ف الصورة



غرفة الانعاش

من غرفة الإنعاش طلع الطبيب مقهور
الذنب مش ذنبها دايرة وعليها الدور
عاشت ف حلم الحب والدنيا ظلماها
ولا حد وياها ... لقت الكتاب .. مسطور

حلم عمرى

نفسى ألملم إالى باقى من سنينى...وأبدره فرح ف طريقك
نفسى يتحرم عليا ... أى ضحكة وأى فرحة تكون لغيرك
نفسى أبدأ عمرى بيك ... وبين إيديك أفرح وأغنى
بس عارف غصب عنى ... والظروف بينى وبينك



صحيح فارس

أنا شوفت بعينى الحزن ذليل..وكمآن بيسلم ويطاطى
من بعد ما شاف الحمل تقيل..ولقآك صابر دايمآ راضى
على طيبة قلبك ألف دليل.. ولا عمرك بالظلم تراضى
بتقول الحق على رقبتك ..وعشآنه تدافع وتعادى

بلاش تحلم

ولو تحلم.. أكيد هتلاقى أحلامك بتتحول فيوم لكابوس
مين غيرك كسر قلبي.. وعلمنى أعدى وأدوس
ومين غيرك سقانى المر.. وشهد الدنيا فى سمومه
قلبك قاسى من يومه.. وغرامك بجن الكبر بقى ممسوس

حيرة قلب

تاه قلبي ف بحر هواك ... ما بين اليم والمرسى
أصدق ف الهوى قلبي... وصوت عقلى يقول أنسى
لكن جويا صوت صدقك يناجى الروح
أتألم وأدارى البوح ... ولا عمرى عليك أفسى

محتوى الكتاب

بطاقة الكتاب	٢
التصنيف	٢
الإهداء	٤
رحلة وداع	٥
ألومك ليه	١٠
حضرة المعنى إلى غايب	١١
قول منهم لله	١٤
كشف حساب	١٥
خطوة عكس	١٦
بنت موت	١٨
توأمى	٢٢
رحلة قمر	٢٣
عمر للبيع	٢٥
رسالة إليها	٢٦
دليل الغرام	٣٢
شيطان الفكر	٣٣
بنمئل على روحنا	٣٥



٣٦	حبك حياة
٣٩	بنت قلبي
٤٠	قصاقيص وجع
٤٣	الدنيا سيما
٤٤	العبرى
٤٨	حروف الكلام
٤٩	عاشقة الوحدة
٥٣	طريق رجوع
٥٤	المحاكمة
٥٨	على شط الحلم
٥٩	عشق صعيدى
٦٢	لقا مبتور
٦٣	بقايا الروح المتهالكة
٦٦	السكوت أعظم
٦٧	خلاصة القول
٧٠	ليلة وجع
٧١	من غير عتاب
٧٣	عادى
٧٤	سر الخلطة
٧٧	أنا بايعة
٧٨	صرخة يتيم

٨١	الشعر كيف
٨٢	لظمة الدنيا
٨٦	مفیش رجوع
٨٧	ساعة لقانا
٩٠	حلم الجدع
٩١	قلم خام
٩٤	قول يارب
٩٥	سكة شيطان
٩٨	الصبر عنوانى
٩٩	عيون الفجر
١٠١	زينة النساء
١٠٢	غرفة الانعاش
١٠٣	حلم عمرى
١٠٤	صحيح فارس
١٠٥	بلاش تحلم
١٠٦	حيرة قلب
١٠٧	محتوى الكتاب

